



Clodoveus filius fuit Childeberti, nepos Merouei, pronepos Clodouei primi, & abnepos Pharamūdi, qui primus Francorum in Galliam irruerat. Is post patrem ob plurimas corporis & animi uirtutes magno omnium cōsensu Francorum rex electus fuit. Cum is adoleuisset, Crothildim Gundobaldi regis Burgūdionum ex fratre Chilperico neptem uxorem petijt. cum autē Christiana puella, quæ multis corporis & animi dotibus erat prædita, ethnicum regem respueret, tandem Clodoveus pro cōnubio pactus, ut Christianum nomē susciperet. Id tamen in aliud tempus distulit, atque nihilominus permisit, ut liberi eius

ex eo matrimonio nati baptizarentur. postea uerò Clodoveus Burgūdijs bellum intulit. repetebatur enim pars regni à Gundobaldo, quæ Chilperici, à fratre Gundobaldo occisi, fuerit, simulq; etiam parricidij ultio querebatur. In eo bello Francus uictor extitit. Accisis itaq; Burgundionum rebus, Crothildis inter maritum & patrum pacem confecit, ea tamen conditione, ut quicquid terræ inter Ligerim & Sequanam esset, Francis cederet, Burgundus ipse Heluetia, Sabaudia, & propriè Burgundia dicta contentus esset.